

欽定古今圖書集成

曆象彙編歲功典



欽定古今圖書集成曆象彙編歲功典
第十七卷目錄
孟春部紀事

歲功典第十七卷

孟春部紀事

宋書禮志高辛氏以十三月為正麋玉以白繪

書經引征每歲孟春適人以木鐸徇于路蔡適人宣

令之官木鐸金口木舌施政教時振以警衆

詩經豳風七月章三之日于耜朱三之日夏正月也

豳土晚寒于耜始修耒耜也

三之日納于凌陰朱納藏也藏冰所以備暑也凌陰

冰室也豳土寒多正月風未解凍故冰猶可藏也

周禮天官大宰之職縣治象之灋于象魏使萬民觀
治象挾日而斂之訂義鄭康成曰大宰以正月朔日布
王治之事于天下至正歲又書而縣于象魏振木鐸
以徇之使萬民觀焉鄭司農曰象魏闕也從甲至甲
謂之挾日凡十日王昭禹曰必至于挾日者蓋近或
知之矣遠者庸有未知焉觀之挾日則使遠近皆徧
知故也

小宰之職正歲帥治官之屬而觀治象之灋徇以木
鐸曰不用灋者國有常刑乃退以宮刑憲禁于王宮

令于百官府曰各修乃職攷乃灋待乃事以聽王命

其有不共則國有大刑訂義鄭康成曰正歲謂夏之正

月得四時之正以出教令者審也賈氏曰大宰以周

之正月始和布之天下至此建寅正歲之正月縣于

象魏其小宰亦助大宰帥治官之屬及萬民以觀之

吳德方曰鄭康成每以正歲爲夏正建寅之月正月

之吉爲周正建子之月竊以爲不然周以建子爲正

凡事皆用本朝正朔若知有不可行處依前參用前

代正朔則不必建子可也經中言歲終卽繼之以正

古今圖書集成
歲爲建寅則歲終非建亥周家自廢其正朔矣若以
歲終爲建亥卽始終有接續無緣住兩月也正月之
吉爲周正一歲之始無疑事有非朔日可行故云正
歲不拘朔日亦可愚案此說謂歲終與正歲正月相
連不應隔絕固然參以凌人十二月斬冰內宰上春
獻種中春始蠶與詩四月維夏六月徂暑見於周幽
王仍襲之後月令次序十二月行事見於秦人未改
正朔之初曷嘗不以建寅紀月其餘又見大史正歲
年說不可不攷王昭禹曰垂以治象使有目者皆覩

徇以木鐸使有耳者皆聞猶有犯焉宜刑之所取也
常刑官刑也小宰掌建邦之宮刑憲禁於王宮憲謂
表而示之使之知禁之所在賈氏曰凡刑禁皆出秋
官今云憲禁者與布憲義同故小宰得秋官刑禁文
書表而懸之於宮內王昭禹曰此王宮中之百官府
也蓋百官有治事於王宮者旣憲禁於王宮又明爲
告令使皆知之

宰夫之職正歲則以灋警戒羣吏令修宮中之職事
書其能者與其良者而以告于上

訂義

鄭司農曰正歲

古今圖書集成
之正月以法戒敕羣吏

凌人春始治鑑凡外內饗之膳羞鑑焉凡酒漿之酒

醴亦如之訂義賈氏曰春謂正月也鄭康成曰鑑如甄

大口以盛冰置食物於中以禦溫氣春而始治之爲

二月將獻羔而啓冰鄭鏗曰春分奎星朝見東方蟄

蟲始出時將用冰始修飾盛冰之器以鑑名之者左

傳曰美澤可以鑑謂其光澤也

內宰歲終則會內人之稍食稽其功事佐后而受獻

功者比其小大與其麤良而賞罰之會內宮之財用

正歲均其稍食施其功事憲禁令于王之北宮而糾

其守訂義賈氏曰正歲建寅之月王氏曰稍食歲終既

會之矣正歲又均焉功事歲終既稽之矣正歲又施

焉

上春詔王后帥六宮之人而生種稷之種而獻之于

王訂義賈氏曰上春亦謂正歲以其春事將興故云上

春鄭康成曰六宮之人夫人以下分居后之六宮者

古者使后宮藏種以其有傳類蕃孳之祥必生而獻

之示能育之使不傷敗且以佐王耕事共禘郊也

地官大司徒之職歲終則令教官正治而致事正歲令于教官曰各共爾職修乃事以聽王命其有不正則國有常刑訂義鄭鏐曰歲終周之季冬今之十月正歲夏之正月今之建寅也歲終令致事所以終時王之事正歲聽命則施教自建寅始也

小司徒之職正歲則帥其屬而觀教灋之象徇以木鐸曰不用灋者國有常刑令羣吏憲禁令修灋糾職以待邦治訂義王昭禹曰禁令將使民避行之宜表揭之使知憲之修法則使各修其所守之法防虧廢也

糾職則使各糾其所治之人防緩散也

鄉師之職正歲稽其鄉器比共吉凶二服閭共祭器

族共喪器黨共射器州共賓器鄉共吉凶禮樂之器

訂義鄭鏐曰比五家耳財適足以制吉凶弔祭之二服

故比集財為之而一比共用焉器則未能備也閭二

十五家財適足以制簠簋鼎俎之器故閭集財以為

之而一閭共用焉族之百家財適足以制夷槃軹軸

之器故族集財以為之而一族共用焉至於射器則

定其位有物謀其功有筭詔之有旌節之有鼓有弓

有矢有侯有布用財多故合五百家之財而爲之賓
器則六十者三豆七十者四豆八十者五豆九十者
六豆有爵有壘有笙有瑟其用尤多故合二千五百
家之財而爲之然後共用也吉凶禮樂之器卽閭族
黨州所共者是已然必於正歲者豈非以春秋之祭
酺祭崇會民而射于序索鬼神而飲酒之類皆用夏
人之正故歟

鄉大夫之職正歲令羣吏攷灋於司徒以退各憲之
於其所治之國

州長正歲則讀教法如初訂義鄭康成曰雖以正月讀
之至正歲復讀之

黨正正歲屬民讀法而書其德行道藝

遂大夫正歲簡稼器修稼政訂義鄭康成曰簡猶閱也

稼器耒耜鎡基之屬稼政孟春之月令所云皆修封
疆審端徑術善相丘陵阪險原隰土地所宜五穀所
殖以教道民必躬親之

春官天府上春釁寶鎮及寶器訂義鄭康成曰上春孟

春釁謂殺牲以血血之鄭鍔曰凡寶之所在必有神

古今圖書集成
者主之故殺牲以釁之所以禳却不祥也然必用上
春者以明守之不失至歲首而更新新之又新至於
無窮歟

龜人上春釁龜

訂義

鄭康成曰上春者夏正建寅之月

月令孟冬大史釁龜筮相互矣秦以十月建亥爲歲
首則月令秦世之書亦或欲以歲首釁龜耳鄭鍔曰
至寶之物神或憑依及上春則殺牲以血塗之既以
祓其不祥且以神之也天府上春釁寶器及寶鎮釁
龜必用上春者亦視爲國寶也

箬人上春相箬

訂義

鄭康成曰相謂更選擇其著著龜

歲易者與鄭鍔曰上春釁龜龜可以血塗筮則但相
視其可用者擇去其不可用者蓋天子之著九尺大
夫七尺士五尺相而易其舊

夏官牧師孟春焚牧

訂義

鄭鍔曰孟春草將生焚去地

之陳根使發生新芽則馬食而充肥

訓方氏正歲則布而訓四方而觀新物

訂義

鄭鍔曰道

其政事與其上下之志則達其說於王使王知之誦
其傳道非特誦之而已取其可以爲訓者作爲戒書

古今圖書集成
於建寅之月布之以誦四方使知其善者可行惡者
可改也布於正歲則順時之始與之更新矣又觀四
方之新物則因夫一歲之始察民之所好時新者如
何道之訓之以俟他時之布黃氏曰布而訓四方使
述其舊美也觀新物察風俗之變也

秋官小司寇之職正歲帥其屬而觀刑象令以木鐸

曰不用灋者國有常刑令羣士

訂義

李嘉會曰刑象既

布木鐸既徇羣士猶然不見不聞而不用法者此常
刑之不恕王昭禹曰令羣士則令於士師鄉士以下

使之稟法故也與小宰帥其屬觀治象同意鄭鍔曰
六十屬爲衆矣所視以效法者在吾之羣士使近而
羣士能率法不越則彼遠而外者詎有不恤於刑乎
故先言帥屬乃言令羣士也

士師之職正歲帥其屬而憲禁令于國及郊野

訂義鄭

康成曰去國百里曰郊郊外謂之野鄭鍔曰小司寇
所宣布者及四方之遠士師憲其近也

管子首憲篇孟春之朝君自聽朝論爵賞校官終五
日

古今圖書集成
士農工商篇正月令農始作服於公田農耕及雪釋
耕始焉芸卒焉

小匡篇正月之朝五屬大夫復事于公注五鄙五屬
大夫每歲報政于君

風俗通義太史公記秦德公始殺狗磔邑四門以禦
蠱災今人殺白犬以血題門戶正月白犬血辟除不
祥取法於此也

史記秦始皇本紀始皇以秦昭王四十八年正月生
於邯鄲及生名爲政姓趙氏注徐廣曰一作正宋忠

曰以正月日生故名正

容齋三筆秦始皇其名曰政自避其嫌以正月爲一
月

史記樂書漢家常以正月上辛祠太乙甘泉以昏時
夜祠到明而終常有流星經於祠壇上使僮男僮女
七十人俱歌青陽

匈奴傳歲正月諸長小會單于庭祠

漢書食貨志孟春之月羣居者將散行人振木鐸徇
於路以采詩獻之太師比其音律以聞於天子

古今圖書集成
郊祀志孟春正月上辛若丁天子親合祀天地於南郊以高帝高后配

西京雜記戚夫人侍兒賈佩蘭後出爲扶風人投儒妻說在宮內時正月上辰出池邊盥濯食蓬餌以祓妖祥

漢書惠帝本紀四年春正月舉民孝弟力田者復其身

史記文帝本紀二年正月上曰農天下之本其開藉田朕親率耕以給宗廟粢盛

漢書武帝本紀元封元年春正月行幸緱氏詔曰親登嵩高御史乘屬在廟旁吏卒咸聞呼萬歲者三登禮罔不答其令祠官加增太室祠

史記武帝本紀漢改曆以正月爲歲首而色尚黃官名更印章以五字因爲太初元年

漢書武帝本紀天漢元年春正月行幸甘泉郊泰畤金谷園記漢武帝嘗以正月殺梟爲羹以賜羣臣食之云使天下之人知殺絕其惡類也

宋書符瑞志漢宣帝五鳳三年正月神雀集京師

古今圖書集成
漢書宣帝本紀五鳳四年春正月大司農中丞耿壽昌奏設常平倉以給北邊省轉漕賜爵關內侯郊祀志上自幸河東之明年正月鳳皇集祓禱於所集處得玉寶起步壽宮

匡衡傳成帝卽位衡上疏曰諸侯正月朝覲天子觀以禮樂饗醴乃歸今正月初幸路寢臨朝置酒以饗萬方願陛下畱神動靜之節使羣下得望盛德休光以立基楨天下幸甚

成帝本紀陽朔四年春正月詔曰洪範八政以食爲

首方東作時其令二千石勉勸農桑出入阡陌致勞來之

永始四年正月行幸甘泉郊泰畤神光降集紫殿平帝本紀元始元年春正月越裳氏重譯獻白雉一黑雉二詔使三公以薦宗廟

元始五年春正月祫祭明堂諸侯王二十八人列侯百二十人宗室九百餘人徵助祭禮畢皆益戶賜爵及金帛增秩補吏各有差

漢官儀建武三十二年東巡狩正月二十八日發洛

陽宮

後漢書明帝本紀永平元年正月帝率公卿以下朝於原陵如元會儀

永平二年正月辛未宗祀光武皇帝於明堂帝及公卿列侯始服冠冕衣裳玉佩絢履以行事禮畢登靈臺望元氣吹時律觀物變羣僚藩輔宗室子孫衆郡奉計百蠻貢職亦皆陪位

永平三年正月癸巳詔曰夫春者歲之始也始得其正則三時有成有司其勉順時氣勸督農桑詳刑慎

罰明察單辭夙夜匪懈以稱朕意

章帝本紀建初元年春正月丙寅詔曰方春東作宜及時務二千石勉勸農桑弘致勞來羣公庶尹各推精誠專急人事

元和二年春正月詔三公曰方春生養萬物孚甲宜助萌陽以育時物其令有司罪非殊死且勿案驗及吏人條書相告不得聽受冀以息事寧人敬奉天氣立秋如故

宋書符瑞志漢章帝元和三年正月車駕北巡以太

牢具祠北嶽有神魚躍出十數

後漢書陳寵傳蕭何草律季秋論囚俱避立春之月
和帝本紀末元三年春正月甲子皇帝加元服賜諸
侯王公將軍特進中二千石列侯宗室子孫在京師
奉朝請者黃金將大夫郎吏從官帛賜民爵及粟帛
各有差大酺五日

安帝本紀元初三年正月東平陸上言木連理

質帝本紀本初元年春正月詔曰昔堯命四子以欽
天道鴻範九疇休咎有象夫瑞以和降異因逆感禁

微應大前聖所重頃者州郡輕慢憲防競逞殘暴造
設科條陷入無罪或以喜怒驅逐長吏恩阿所私罰
枉仇隙至今守闕訴訟前後不絕送故迎新人離其
害怨氣傷和以致災眚書曰明德慎罰方春東作育
微敬始其敕有司罪非殊死且勿案驗以崇在寬
晉書禮志魏文帝黃初二年正月乙亥祀朝日於東
郊之外

黃初七年正月命中宮蠶於北郊依周典也

魏志明帝本紀青龍元年正月甲申青龍見郊之摩

陂井中

晉書武帝本紀泰始二年春正月遣兼侍中侯史光等持節四方循省風俗除禳祝之不在祀典者

泰始五年春正月癸巳申戒郡國計吏守相令長務盡地利禁游食商販

外紀晉惠帝正月百花未開令宮人剪五色通草花王隱晉書慕容皝上言曰正月十二日臣躬征平郭遠假陛下之威將士竭命精誠感靈海爲結冰凌行海中三百餘里臣問諸故老言自立國以來初無海

水冰凍之歲

晉書禮志康帝建元元年正月將北郊太常顧和表漢咸和中議別立北郊同用正月魏承後漢正月祭天以地配時高堂隆等以爲禮祭天不以地配而稱周禮三王之郊一用夏正於是從和議是月辛未南郊辛巳北郊帝皆親奉

南燕錄慕容德正月渡黎津流澌冰合鄴令韓軌言於德曰昔光武渡滹沱冰澌自合今大王濟河天橋自成德乃大悅

古今圖書集成
宋書符瑞志太元十九年正月丁亥華林園延賢堂
西北李樹連理

拾遺記江東俗稱正月二十日爲天穿日以紅絲縷
繫煎餅置屋上謂之補天漏相傳女媧氏以是日補
天故也

宋書文帝本紀元嘉二十九年正月甲子詔曰今農
事行興務盡地利若須田種隨宜給之

通典宋孝武大明二年正月有司奏今月六日南郊
輿駕親奉至時或雨遂遷日有司行事

宋書孝武帝本紀大明七年正月癸未詔曰春蒐之
禮著自周令講事之語書於魯史今歲稔氣榮中外
寧晏當因農隙葺是舊章可克日於元武湖大閱水
師並巡江右講武校獵

梁書武帝本紀天監十六年正月辛未輿駕親祀南
郊詔曰朕當辰思治政道未明昧旦劬勞亟移星紀
今太皞御氣勾芒首節升中就陽禮敬克展務承天
休布茲和澤尤貧之家勿收今年三調其無田業者
所在量宜賦給若民有產子卽依格優蠲孤老鰥寡

古今圖書集成
不能自存咸加賑卹班下四方諸州郡縣時理獄訟
勿使冤滯並若親覽

隋書天文志普通元年春正月丙子日有食之占曰
日食陰侵陽陽不克陰也爲大水其年七月江淮海
溢

梁書武帝本紀普通二年正月辛巳輿駕親祀南郊
詔曰春司御氣虔恭報祀陶匏克誠蒼璧禮備思隨
乾覆布茲亭育凡民有單老孤稚不能自存主者郡
縣咸加收養贍給衣食

中大通五年春正月辛卯輿駕親祠南郊先是一日
東南郊令解滌之等至郊所履行忽聞空中有異香
三隨風至及將行事奏樂迎神畢有神光滿壇上朱
紫黃白雜色食頃方滅兼太宰武陵王紀等以聞

北史李業興傳梁武問尚書正月上日此時何正業
興對曰此夏正月梁武言何以得知業興曰案尚書
中候運衡篇云日月營始故知夏正

魏書禮志立祖神常以正月上未設藉於端門內祭
牲用羊豕犬各一

文成皇帝卽位三年正月遣有司詣華岳修廟立碑
數十人在山上聞虛中若音聲聲中稱萬歲云

靈徵志太和八年正月上谷郡惠化寺醴泉涌醴泉
水之精也味甘美王者修治則出

隋書禮儀志北齊每歲正月上辛後吉亥祠先農祭
訖司農進種稷之種六宮主之

後齊正晦汎舟皇帝乘輿鼓吹至行殿升御坐乘板
輿以與王公登舟置酒非預泛者坐於便幕

律曆志後齊參軍信都芳深有巧思能以管候氣仰

觀雲色嘗與人對語卽指天曰孟春之氣至矣人往
驗管而飛灰已應每月所候言皆無爽

荆楚歲時記正月夜多鬼鳥度家家搥牀打戶捩狗
耳滅燈燭以禳之

注

按元中記云此鳥名姑獲一名

天地女一名隱飛鳥一名夜行遊女好取人女子養
之有小兒之家卽以血點其衣以爲誌故世人名爲
鬼鳥荆州彌多斯言信矣

正月未日夜蘆苣火照井廁中則百鬼走

元日至於月晦並爲酺聚飲食士女泛舟或臨水宴

樂注按每月皆有弦望晦朔以正月初年時俗重以爲節也玉燭寶典曰元日至月晦今並酺食度水土女悉湔裳酌酒於水湄以爲度厄今世人唯晦日臨河解除婦人或湔裙

正月五日爲牛今五日不殺牛

隋書文帝本紀開皇十九年正月戊寅大射武德殿宴賜百官

禮儀志隋制於國城東北七里通化門外爲風師壇祀以立春後丑

食貨志高頴以人間課輸雖有定分年常徵納除注恆多長吏肆情文帳出沒復無定簿難以推校乃爲輸籍定樣請遍下諸州每年正月五日縣令巡人各隨便近五黨三黨共爲一團依樣定戶上下帝從之老學庵筆記唐高祖實錄武德二年正月甲子下詔曰釋典微妙淨業始於慈悲道教冲虛至德去其殘暴况乎四時之禁毋伐麋卵三驅之禮不取順從蓋欲敦崇仁惠蕃衍庶物立政經邦咸率斯道朕祇膺靈命撫遂羣生言念亭育無忘鑒昧殷帝去網庶踵

古今圖書集成
前修齊王捨牛實符本志自今每年正月五月九月
十直日並不得行刑所在公私宜斷屠殺此三長月
斷屠殺之始也

唐會要武德九年正月親祠太社丙子詔曰吉日惟
戊親祠太社率從百僚以祈五穀

舊唐書百官志凡衛士各立名簿其三年以來征防
差遣仍定優劣爲三第每年正月十日送本府印記
仍錄一道送本衛府若有差行上番折衝府據簿而
析之

玉海唐太宗貞觀二年正月二十一日親祭先農藉
於千畝之甸祕書郎岑文本獻藉田賦

舊唐書禮儀志貞觀十四年春正月庚子命有司讀
春令詔百官之長升太極殿列坐而聽之

唐書禮樂志太宗將親耕給事中孔穎達議曰禮天
子藉田南郊諸侯東郊今帝社乃東壇未合於古太
宗曰書稱平秩東作而青輅黛耜順春氣也五方位
少陽田宜於東郊乃耕於東郊

唐會要末徽三年正月二十九日丁亥親享先農躬

古今圖書集成
乘耒耜率公卿耕於千畝之田

唐書禮樂志高宗乾封元年封泰山是歲正月天子祀昊天上帝於山下之封祀壇親封玉冊置石礮聚五色土封之

舊唐書音樂志調露二年正月二十一日則天御洛城南樓賜宴太常奏六合還淳舞

玉海永隆二年正月十日唐高宗會羣臣命婦合宴宣政殿太常博士袁利正上疏曰前殿正寢非命婦宴會之所帝從之改向麟德殿

唐詩紀事中宗正月晦日幸昆明池賦詩羣臣應制百餘篇帳殿前結綵樓命上官昭容選一首爲新翻御製曲從臣悉集其下須臾紙落如飛各認其名而懷之惟沈宋二詩不下又移時一紙飛墮乃沈詩也及聞其評云沈詩落句微臣彫朽質羞覩豫章材詞氣已竭宋詩云不愁明月盡自有夜珠來猶涉健舉沈乃伏不敢爭

景龍四年正月五日蓬萊宮宴吐蕃使因爲柏梁體時上疑竇從一宗晉卿素不屬文未卽令續二人固

古今圖書集成
請許之吐蕃舍人明悉獵請令授筆與之悉獵云玉
醴由來獻壽觴上大悅賜與衣服

唐書武后本紀天授元年以正月爲一月久視元年
十月甲寅復唐正月大赦

唐會要天授二年正月二十二日內出繡袍賜新除
都督刺史其袍繡山形繞山勒回文銘曰德政推明
職令思平清慎忠勤榮進躬親

舊唐書音樂志延載元年正月二十三日製越古長
年樂一曲

玉海長安二年正月十七日始置武舉每年準明經
進士例送其制有長槩馬射步射平射筒射又有馬
槍翹關負重身材之選

開元十九年正月二十四日吐蕃請五經明皇賜以
毛詩禮記左傳文選于休烈上言不可裴光庭曰西
域請詩書庶使潛陶聲教上曰善乃與之

唐會要開元十九年正月三十日詔州縣社惟用酒
脯

玉海開元二十三年正月十八日親祀先農降至耕

古今圖書集成
位侍中執耒太僕秉轡上謂左右曰帝藉之禮古則
三推朕今九推庶九穀之報也

唐會要開元二十六年正月六日修望春宮

正月八日親迎氣於東郊之青帝壇

唐人輦下歲時記正月戶部奏大閱天下貢物於都
堂其日放朝宰相與百官皆赴戶部宴會一時特盛
開元中曾以大閱一日貢物賜李林甫九州任土盡
歸人臣之家國史書其事也

仙傳拾遺吐蕃以寶函進唐明皇曰請陛下自開勿

令他人知此機密上問葉法善法善請令蕃使自開
上從之蕃使果中函弩死因授法善銀青光祿大夫
法善請松陽宅爲觀賜號淳和御製碑額以榮鄉里
正月二十七日有雲鶴百行翔集瑞雲五色覆其居
舊唐書禮儀志天寶元年正月癸丑陳王府參軍田
同秀稱于京兆昌街空中見元元皇帝傳言天下太
平聖壽無疆仍云桃林縣故關令尹喜宅有靈寶符
發使求之十七日獻于含元殿

唐會要天寶二年正月二十八日築神都羅城號曰

古今圖書集成
金城

唐明皇送賀知章歸四明詩序天寶三年太子賓客賀知章正月五日將歸會稽遂餞東路乃命六卿庶尹大夫供帳青門寵行邁也詩遺榮期入道辭老竟抽簪豈不惜賢達其如高尚心寰中得祕要方外散幽襟獨有青門餞羣僚悵別深

唐書元宗本紀天寶三載正月丙申改年爲載

唐會要天寶五載正月二十三日詔曰堯命四子所受惟時周分六官曾不繫月其禮記月令宜改爲時

令

天寶六載正月十二日封四瀆號河爲靈源公濟爲

清源公江爲廣源公淮爲長源公

翰墨大全天寶六載正月十八日詔重門夜開以達陽氣

唐會要天寶六載正月二十九日詔今陽和布氣蠢物懷生在於含養必期遂性其滎陽僕射陂陳畱蓬池宜斷採捕仍改僕射陂爲廣仁陂蓬池爲福源池天寶十載正月二十三日明皇封東鎮沂山爲東安

公南鎮會稽山為永興公西鎮吳山為成德公中鎮霍山為應聖公北鎮醫巫閭山為廣寧公封東海為廣德公南海為廣利公西海為廣潤公北海為廣澤公

開天遺事都人士女每至正月半後各乘車跨馬供帳於園圃或郊野中為探春之宴

雲仙雜記長安風俗元日以後遞飲食相邀號傳座避暑漫抄安氏將亂于中原梁朝誌公大師有語曰兩角女子綠衣裳却背太行邀君王一止之月必消

亡兩角女子安字綠者祿字也一止正月也果正月敗亡

舊唐書肅宗本紀乾元二年正月戊寅有事於藉田上行九推禮官奏太過曰朕勸農率下恨不終千畝耳禮畢雪盈尺

玉海唐順宗正月十二日誕為聖壽節

元稹詩序永貞二年正月二日上御丹鳳樓赦天下予與李公垂庾順之閒行曲江不及盛觀詩春來饒夢慵朝起不看千官擁御樓却著閒行是忙事數人

同傍曲江頭

唐會要元和二年正月辛卯郊享獻之次景物澄霽及鑿輿就次則微雪大駕將動則又止翌日御樓宣赦畢瑞雪盈尺

遵生八牋韓文公云正月乙丑晦主人使奴星結柳作車縛草爲船載糗與糧三揖窮鬼而送之注相傳

高陽氏子好衣敝食糜正月晦日巷死世人於是日作粥糜破衣棄於巷祝曰送窮鬼

唐書五行志寶曆元年正月乙卯流星出北斗樞星

光燭天入濁占曰有赦

舊唐書文宗本紀故事吳蜀貢新茶皆於冬中作法爲之上務恭儉不欲逆其物性詔所供新茶宜于立春後造

禮儀志會昌二年正月十三日祀九宮貴神敕宰相崔琪攝太尉行事

歲華紀麗譜咸通十年正月二日街坊點燈張樂晝夜喧闐蓋大中承平之餘風由此言之唐時放燈不獨上元也

酉陽雜俎北朝婦人常以正月進箕帚長生花

續博物志清泰小字二十三蓋正月二十三日生也
以是日爲千春節人臣奏對但云兩旬三日或數物
則云二十二更過二十四不敢斥尊也

五代史司天考晉司天監馬重績起唐天寶十四載
乙未爲上元用正月雨水爲氣首

清異錄閩甘露堂前兩株茶鬱茂婆娑宮人呼爲清
人樹每春初嬪嬙戲摘新芽堂中設傾筐會

續博物志山東風俗遇正月取五姓女年十餘歲共

臥一榻覆之以衾以箕扇之良久如夢寐或欲刺文
繡事筆硯理管絃俄頃乃寤謂之扇天上以乞巧

雲谷雜記太祖潛耀日與一道士遊於闕河每劇飲
爛醉道士善歌能引其喉於杳冥之間作清徵之聲
時或聞一二句曰金猴虎頭四真龍得其位詰之則
曰醉夢豈足憑耶至膺圖受命之日乃是庚申正月
初四日也

玉海乾德二年正月詔土膏將起宜課東作之勤使
地無遺利歲有餘糧

宋史西蜀世家孟昶命學士爲詞題桃符以其非工自命筆題云新年納餘慶嘉節號長春以其年正月十一日降太祖命呂餘慶知成都而長春乃聖節名也

玉海太平興國三年正月二十八日癸丑幸迎春苑習射帝中的者九

宋史五行志太平興國六年正月瑞安縣民張度解木五片皆有天下太平字

禮志太平興國九年正月六日幸景龍門外水磴帝

臨水而坐召從臣觀之因曰此水出於山源清澄甘潔近河之地水味皆甘豈河潤所及乎宋琪等曰亦猶人性善惡染習致然帝曰卿言是也

玉海雍熙二年正月壬戌有星出東井其大倍於金星至輿鬼沒占云四表來貢是歲占城邛部川蠻西南蕃來貢

雍熙五年正月十七日御觀耕臺觀王公耕端拱二年正月詔興置方田命八作使竇神興等往北面興功東壁則知定州張永德西壁則知邢州米

古今圖書集成
信各兼方田都總管

淳化三年正月丙辰舒州言甘露降靈仙觀三清閣前柏木畫圖來獻上以示近臣宰相李昉等表賀詔楊億試舒州進甘露頌

宋史禮志淳化四年正月以南郊禮成大宴含光殿玉海至道元年正月丙辰新作上清宮成御書額以金填其字賜之車駕臨幸謂近臣曰造此祠宇爲民祈福

至道二年正月庚戌上出次南郊齋宮詔有司畫南

郊圖三幅外幅列儀衛中幅車輅及導駕官人物皆長寸餘又圖畫園壇祭器樂駕警場青城別爲圖以紀一時之盛

宋史真宗本紀景德二年正月戊寅取淮楚間踏犁式頒之河朔

禮志景德三年十二月陳彭年言來年正月三日辛祈穀至十日始立春按月令春秋傳當在建寅之月迎春之後後齊永明元年立春前郊議者欲遷日王儉啓云宋景平元年元嘉六年並立春前郊遂不

遷日然則左氏所記啓蟄而郊乃三代彝章王儉所啓郊在春前乃後世變禮望常以正月立春之後行上辛祈穀之禮從之

大中祥符元年正月詔應致仕官並令赴都亭驛酺宴御樓日合預坐者亦聽又詔朝臣已辭未見並聽赴會凡賜酺命內諸司使三人主其事於乾元樓前露臺上設教坊樂又駢繫方車四十乘上起綵樓者二分載鈞容直開封復爲棚車二十四每十二乘爲之皆駕以牛被之錦繡縈以綵紉分載諸軍京畿伎

樂又於中衢編木爲欄處之徙坊市邸肆對列御道百貨駢布競以綵幄鏤版爲飾上御乾元門名京邑父老分番列坐樓下傳旨問安否賜以衣服茶帛若五日則第一日近臣侍坐特名丞郎給諫上舉觴教坊樂作二大車自昇平橋而北又有旱船四挾之以進棚車由東西街交驚並往復日再焉東距望春門西連閭闔門百戲競作歌吹騰沸宗室親王近列牧伯泊舊臣宗室官爲設綵棚於左右廊廡士庶縱觀車騎填溢歡呼震動第二日宴羣臣百官於都亭驛

宗室於親王宮第三日宴宗室內職於都亭驛近臣於宰相第第四日宴百官於都亭驛宗室於外苑第五日復宴宗室內職於都亭驛近臣於外苑多作詩賜令屬和及別爲勸酒詩禁軍將校日會於殿前馬步軍之廨

諸慶節古無是也真宗以後始有之大中祥符元年詔以正月三日天書降日爲天慶節休假五日兩京諸路州府軍監前七日建道場設醮斷屠宰節日士庶特令宴樂京師然燈

玉海大中祥符四年正月己丑司天言農丈人星見主歲豐

大中祥符五年正月癸酉命學士晁迥等知貢舉六日甲戌上作詩賜晁迥等曰盛時選士貢闈開罄宇聞風獻藝來心以權衡求實效勿令蓬華有遺才大中祥符六年正月癸巳朔五星同色占曰天下兵偃

宋史禮志真宗大中祥符六年正月二十一日帝服通天冠絳紗袍奉上太上老君加號冊寶夜漏上五

刻侍史奉天書赴太清宮升殿改服袞冕行朝謁禮畢奉冊寶於玉匱纏以金繩封以金泥

玉海大中祥符七年正月九日學士院上應天府瑞雲樂章

正月二十三日御奉元均慶樓觀酺從官與坐宴父老於樓下設山車百戲聽民縱觀

大中祥符九年正月癸亥蜀州獻合歡竹圖

天禧元年正月丙寅韶州獻瑞木文曰天下太平

正月二十日己未作喜春雨詩賜學士以下屬和

宋史禮志仁宗以正月八日爲皇太后長寧節詔定

長寧節上壽儀太后垂簾崇政殿百官及契丹使班

庭下宰臣以下進奉上壽閣門使於殿上簾外立侍

百官再拜宰臣升殿跪進酒簾外內臣跪承以入宰

臣奏曰長寧節臣等不勝歡忭謹上千萬歲壽復降

再拜三稱萬歲內臣承旨宣曰得公等壽酒與公等

同喜咸再拜宰臣升殿內侍出簾外跪授虛醖宰臣

跪受降再拜舞蹈三稱萬歲內侍承旨宣羣臣升殿

再拜升陳進奉物當殿廷通事舍人稱宰臣以下進

古今圖書集成
奉客省使殿上喝進奉出內謁者監進第二醖賜酒
三行侍中奏禮畢皆再拜舞蹈太后還內百官詣內
東門拜表稱賀其外命婦舊入內者卽入內上壽不
入內者進表內侍引內命婦上壽次引外命婦如百
官儀次日大宴

玉海明道二年正月二十五日大禮使以製成御未
和青箱等奏御

景祐二年正月二十八日置邇英延義二閣寫尚書
無逸篇於屏是日仁宗御延義閣召輔臣觀之

宋史禮志英宗以正月三日爲壽聖節禮官奏故事
聖節上壽親王樞密於長春殿宰臣百官於崇德殿
天聖諒闇皆於崇政殿於是紫宸上壽羣臣升殿間
飲獻一觴而退又一日賜宴於錫慶院

聞見後錄夔峽之人歲正月十百爲曹設牲酒於田
間已而衆操兵大噪謂之養去聲烏鬼長老言地近烏
蠻戰場多與人爲厲用以禳之

蘇軾詩序正月二十六日偶與客野步嘉祐僧舍東
南野人家雜花盛開叩門求觀主人林氏媪出應白

髮青裾少寡獨居三十年矣感歎之餘作詩紀之
楚通志正月二十二日東坡將往岐亭宿於團風夢
一僧破面流血若有所訴至岐亭過一廟中有阿羅
漢像左龍右虎儀制甚古而面爲人所壞顧之宛如
夢中所見遂載以歸完新而龕之設於安國寺
事文類聚元祐二年正月東坡在汝陰堂前梅花大
開月色鮮霽王夫人曰春月色勝於秋月色秋月色
令人慘悽春月色令人和悅先生大喜曰吾不知子
能詩耶此真詩家語矣

聞見近錄夔峽將至灑瀕堆峽左岩上有題聖泉二
字泉上有大石謂之洞石而初無泉也至者擊石大
呼則水自石下出予嘗往焚香俾舟人擊之舟人呼
曰山神土地人渴矣久之不報一卒無室家復大呼
曰龍王龍王萬姓渴矣隨聲水大注時正月雪寒其
水如湯或曰夏則如冰凡呼者必以萬歲必以龍王
呼之水於是出矣

岳陽風土記岳州自元正獻歲鄰里以宴飲相慶至
十二日罷謂其日爲雲開節

古今圖書集成
宋史禮志政和三年以正月四日有太祖神御之州府宮殿行香爲開基節

政和六年正月七日御筆今歲閏餘候晚猶未春和晷短氣寒於宴集無舒緩之樂景靈宮朝獻移十四日東宮十五日西宮畢詣上清儲祥宮燒香十六日詣醴泉觀等處燒香上元節移於閏正月十四日爲始

東京夢華錄正月一日年節開封府放關撲三日士庶自早互相慶賀坊巷以食物動使果實柴炭之類

歌叫關撲如馬行潘樓街州東宋門外州西梁門外踴路州北封丘門外及州南一帶皆結綵棚鋪陳冠梳珠翠頭面衣著花朵領抹靴鞋玩好之類間列舞場歌館車馬交馳向晚貴家婦女縱賞關賭入場觀看入市店飲宴慣習成風不相笑訝至寒食冬至三日亦如此小民雖貧者亦須新潔衣服把酒相酬爾收燈畢都人爭先出城探春州南則玉津園外學方池亭榭玉仙觀轉龍灣西去一丈佛園子王太尉園奉聖寺前孟景初園四里橋望牛岡劍客廟自轉龍

灣東去陳州門外園館尤多州東宋門外快活林勃
濟陂獨樂岡硯臺蜘蛛樓麥家園虹橋王家園曹宋
門之間東御苑乾明崇夏尼寺州北李駙馬園州西
新鄭門大路直過金明池西道者院院前皆妓館以
西宴賓樓有亭榭曲折池塘鞦韆畫舫酒客稅小舟
帳設遊賞相對祥祺觀直至板橋有集賢樓蓮花樓
乃之官河東陝西五路之別館尋常餞送置酒於此
過板橋有下松園王太宰園杏花岡金明池角南去
水虎翼巷水磨下蔡太師園南洗馬橋西巷內華嚴

尼寺王小姑酒店北金水河兩浙尼寺巴婁寺養種
園四時花木繁盛可觀南去藥梁園童太師園南去
鐵佛寺鴻福寺東西柏榆村州北模天坡角橋至倉
王廟十八壽聖尼寺孟四翁酒店州西北元有庶人
園有創臺流盃亭榭數處放人春賞大抵都城左近
皆是園圃百里之內並無閒地次第春容滿野暖律
暄晴萬花爭出粉牆細柳斜籠綺陌香輪暖輾芳草
如茵駿騎驕嘶杏花如繡鶯啼芳樹燕舞晴空紅妝
按樂於寶榭層樓白面行歌近畫橋流水舉目則鞦

古今圖書集成
韃巧笑觸處則蹴踔疎狂尋芳選勝花絮時墜金樽
折翠簪紅蜂蝶暗隨歸騎於是相繼清明節矣

玉海紹興十四年正月二十六日內出鎮圭以奉文
宣王初有司欲用珉上曰崇奉先聖豈可用假玉詔
以真玉圭降出

宋會要宋高宗紹興十五年正月二日瀘南獻嘉禾
九穗

乾淳起居注淳熙八年正月初二日未初雪大下正
是臘前官家甚喜令有司比去年倍數支散貧民節

使吳琚進喜雪水龍吟詞

宋史禮志理宗以正月五日爲天基節

揮塵後錄楚俗遇元夕第三夜多以更闌時微行聽
人言語以上一歲之通塞

道山清話何斯舉作黃綿襖子歌序正月大雨雪十
日不已旣晴鄰里相呼負日曰黃綿襖子出矣

演繁露達魯河東與海接歲正月方凍其釣魚也王
與其母皆設次冰上先使人於河上下十里間以毛
網截魚令不得散逸又從而驅之其牀前預開冰竅

古今圖書集成
四各有冰眼中眼透水旁三眼環之不透第斲減令薄而已薄者所以候魚而透者將以施鉤也魚之將至伺者以告遂於斲透眼中用繩鉤擲之無不中者謂之得頭魚頭魚既得遂相與出冰帳於別帳作樂上壽

溪蠻叢笑土俗歲節數日野外男女分兩朋各以五色綵囊豆粟往來拋接名飛純

金史太祖本紀天輔七年正月甲申詔令農事將興典兵官毋縱軍士動擾人民以廢農業

熙宗本紀天會十四年正月十七日萬壽節齊高麗夏遣使來賀

世宗本紀大定四年正月二十五日辛亥獲頭鵝遣使薦山陵自是歲以爲常

大定二十年正月命歲以錢五千貫造隨朝百官節酒及冰燭藥炭視品秩給之

禮志明昌五年爲壇於景風門外東南歲以立春後丑日祀風師

天文志興定五年正月山東行省蒙古綱奏慶雲見

命圖以進
五行志元光二年正月十八日辛酉日午有鶴千餘
翔殿庭移刻乃去
元史祭祀志歲正月十五日宣政院同中書省奏請
先期中書奉旨移文樞密院八衛撥傘鼓手一百二
十人殿後軍甲馬五百人擡舁監壇漢關羽神轎軍
及雜用五百人宣政院所轄宮寺三百六十所掌供
應佛像壇面幢幡寶蓋車鼓頭旗三百六十壇每壇
擊執擡舁二十六人鈸鼓僧十二人大都路掌供

各色金門大社一百二十隊教坊司雲和署掌大樂
鼓板杖鼓篳篥龍笛琵琶箏箏七色凡四百人興和
署掌妓女雜扮隊戲一百五十人祥和署掌雜把戲
男女一百五十人儀鳳司掌漢人回回河西三色細
樂每色各三隊凡三百二十四人凡執役者皆官給
鎧甲袍服器仗俱以鮮麗整齊爲尚珠玉金繡裝束
奇巧首尾排列三十餘里都城士女閭閻聚觀禮部
官點視諸色隊仗刑部官巡綽喧鬧樞密院官分守
城門而中書省官一員總督視之先二日於西鎮國

古今圖書集成
寺迎太子遊四門昇高塑像具儀仗入城十四日帝
師率梵僧五百人於大明殿內建佛事至十五日恭
請傘蓋於御座奉置寶輿諸儀衛隊仗列於殿前諸
色社直暨諸壇面列於崇天門外迎引出宮至慶壽
寺具素食食罷起行從西宮門外垣海子南岸入厚
載紅門由東華門過延春門而西帝及后妃公主於
五德殿門外搭金脊五殿綵樓而觀覽焉及諸隊仗
社直送金傘還宮復恭置御榻上帝師僧衆作佛事
至十六日罷散歲以爲常謂之遊皇城或有因事而

輟尋復舉行

正月祀東嶽鎮海瀆祀官以所在守土官爲之

歲華紀麗譜正月二日太守出東郊早宴移忠寺

舊名

碑婁院

晚宴大慈寺清獻公記云宴罷妓以新詞送茶

自宋公祁始蓋臨邛周之純善爲歌詞嘗作茶詞授
妓首度之以奉公後因之

五日五門蠶市蓋蠶叢氏始爲之俗往往呼爲蠶叢
太守卽門外張宴

二十三日聖壽寺前蠶市張公詠始卽寺爲會使民

鬻農器太守先詣寺之都安王祠奠獻然後就宴舊
出萬里橋登樂俗園亭今則早宴祥符寺晚宴信相
院

二十八日俗傳為保壽侯誕日出竿橋門即侯祠奠
拜次詣淨眾寺邠國杜丞相祠奠拜畢事會食晚宴
大智院

輟耕錄至元四年正月城京師以為天下本右擁太
行左注滄海撫中原正南面枕居庸奠朔方峙萬歲
山浚太液派玉泉通金水縈畿帶甸負山引河壯哉

帝居擇此天府

明會典凡每歲正旦節自初一日為始文武百官放
假五日

帝京景物略正月十三日家以小瑣一百八枚夜燈
之徧散井竈門戶砧石曰散燈也其聚如螢散如星
正月十六日婦女著白綾衫隊而宵行謂無腰腿諸
疾曰走橋至城各門手暗觸釘謂男子祥曰摸釘

丘真人名處機字通密號長春子金皇統戊辰正月
十九日生都人以正月十九日致漿祠下游冶紛沓

走馬捕博謂之燕九節

北京歲華記正月初八九日至十八日人家用粉糝
寒具相饋遺徧市鬻之以五花帚為號

帝京歲時雜記正月十八日
郊正月
四會典
帝京雜記

欽定古今圖書集成曆象彙編歲功典

第十八卷目錄

孟春部雜錄

孟春部外編

立春部彙考一

周 總一則

後漢 總一則

北魏 總一則

北齊 總一則

唐 總一則 元宗開元一則 肅宗乾元一則

遼 總一則

宋 總一則 仁宗景祐一則 孝宗淳熙二則

明 太祖洪武一則 成祖永樂一則 神宗萬曆一則

歲功典第十八卷

孟春部雜錄

公羊傳王正月疏凡草物皆十二月萌芽始出而首黑

王者應以十三月為正則命以黑瑞

易飛候正月有偃月必有嘉王

易通卦驗正月中猛風至注猛風動搖樹木有聲者

春秋感精符月建寅物生之端謂之人統夏以為正

管子菁茅謀孟春且至溝瀆阮而不遂谿谷報上之

古今圖書集成
水不安於藏內毀室屋壞牆垣外傷田野殘禾稼故
君謹守泉金之謝物且爲之舉

正月之朝穀始也

輕重甲篇孟春既至農事且起大夫無得繕冢墓理
宮室立臺榭築牆垣北海之衆無得聚庸而煮鹽
師曠占五穀正月甲戌日大風東來折樹者穀熟甲
寅日大風西北來者貴庚寅日風從西來者皆貴
陶朱公書雨水後陰多主少水高下大熟雷多主人
民不安月蝕粟賤虹見主七月穀貴

十六日謂之落燈夜晴主高低皆熟東南風水鄉好
西北風主旱

正月上旬稱水卜十二月之水旱初一日起用一瓦
瓶每朝取水稱之重則雨多輕則雨少初一占正月
初二占二月餘倣此

占桑葉貴賤只看正月上旬木在一日則爲蠶食一
葉爲甚貴木在九日則爲蠶食九葉爲甚賤

尚書大傳以正月朝迎日於東郊所以爲萬物先而
尊事天也

古今圖書集成
史記天官書攝提格歲歲陰左行在寅歲星右轉居
丑正月與斗牽牛晨出東方名曰監德色蒼蒼有光
其失次有應見柳歲早水晚旱

白帝行德以正月二十日二十一日月暈圍常大赦
載謂有太陽也

漢書律歷志正月乾之九三萬物棣通族出於寅人
奉而成之仁以養之義以行之令事物各得其理寅
木也爲仁其聲商也爲義故太簇爲人統注孟康曰
棣謂通意也

淮南子天文訓天一元始正月建寅日月俱入營室
五度天一以始建七十六歲日月復以正月入營室
五度無餘分名曰一紀

斗杓爲小歲正月建寅月從左行注第五至第七爲
杓

春秋繫露陽尊陰卑篇陽氣以正月始出於地生育
長養於上

四祭篇春曰祠祠者以正月始食韭也
大戴禮記盛德篇古者天子孟春論吏德行能理功

能德法者爲有德能行德法者爲有行能理德法者
爲有能能成德法者爲有功故論吏而法行事治而
功成

誥志篇虞夏之歷正建於孟春於時冰泮發蟄百草
權輿瑞雉無釋物乃歲俱生於東以順四時

博雅正月有微霜八月浮雲不歸

後漢書郎顛傳正月三日至于九日三公卦注凡卦

法一爲元士二爲大夫三爲三公四爲諸侯五爲王
位六爲宗廟音義云分卦直日之法爻主一日卽三

日九日並爲三公之日也

正月者歲之始也王者則天之象因時之序宜開發
德號爵賢命士流寬大之澤垂仁厚之德順助元氣
含養庶類

東方朔占書上旬三日得甲爲上歲四日中歲五日
下歲月內有甲寅米賤

上旬一日得辛旱二日小收三四日主木麥半收五
六日小旱七分收八日歲稔一云春旱不收又上旬
一日辛麥收十分二日禾蠶收三日四日田蠶全收

古今圖書集成
五日六日麻粟麥蠶半收七日八日早禾麻麥粟少收絲貴

上旬一日得卯主禾十分收二日低田半收三四日大水五日六日半收七日八日春澇全收

上旬一日得辰雨多二日風多先旱半熟低田全收七月雨多麻豆全收三日雨晴勻四日收七分五日歲稔六日大稔七日水損田蕎麥收八日先旱後澇九日大麥收仲夏水災十日旱禾半收十一日五穀不收冬大雪十二日冬大雪五穀收

上旬一日二日得酉大豐三日四日民安五日至十日

日中歲民不安十一日十二日歲大熟

月內有三子葉少蠶多無三子則葉多蠶少

月內有三卯宜豆無則早種禾

白虎通五行篇正月律謂之太簇何太亦大也簇者湊也言萬物始大湊地而出也

三正篇禮三正記曰正朔三而改文質再而復也三微者何謂也陽氣始施黃泉萬物動微而未著也十一月之時陽氣始養根株黃泉之下萬物皆赤赤者

盛陽之氣也故周爲天正色尚赤也十二月之時萬物始牙而白白者陰氣故殷爲地正色尚白也十三月之時萬物始達孚甲而出皆黑人得加功故夏爲人正色尚黑尚書大傳曰夏以孟春月爲正殷以季冬月爲正周以仲冬月爲正夏以十三月爲正色尚黑以平日爲朔殷以十二月爲正色尚白以雞鳴爲朔周以十一月爲正色尚赤以夜半爲朔不以二月後爲正者萬物不齊莫適所統故必以三微之月也紼冕篇謂之收者十三月之時氣收本舉生萬物而

達出之故謂之收

士冠經曰毋追夏后氏之道夏統十三月爲正其飾最大故曰毋追毋追者言其追大也

論衡雷虛篇正月陽動故正月始雷

說文笙正月之音物生故謂之笙十三簧象鳳之身四民月令正月地氣上騰土長冒櫛陳根可拔急菑強土黑墟之田

正月糞疇疇麻田也

正月可種瓜瓠葵芥薤大小葱蒜苜蓿及雜蒜亦種

古今圖書集成
正月可作諸醬肉醬清醬

正月自朔暨晦可移諸樹竹漆桐梓松柏雜木唯有
果實者及望而止過十五日則果少實

正月上辛日掃去韭畦中枯葉

獨斷夏以十三月爲正律中太簇言萬物始蘇而生
故以爲正也

帝王世紀連山易其卦以純艮爲首艮爲山山上山
下是名連山雲氣出內於山夏以十三月爲正人統
艮漸正月故以艮爲首

三禮義宗五行之官木正曰勾芒者物始生皆勾屈
而芒角因用爲官名也

魏書律曆志次卦正月小過蒙益漸泰

齊民要術桑柘熟時收黑魯椹卽日以水淘取子曬
燥仍畦種常薺令淨明年正月移栽之率五尺一根
其下常劬掘種菜豆小豆栽後二年慎勿採沐大如
臂許正月中移之率十步一樹行欲小犄角不用正
相當須取栽者正月二月中以鉤弋壓下枝令著地
條葉生高數寸仍以燥土壅之明年正月中截取而

古今圖書集成
種之

欲知歲所宜以布囊盛粟等諸物種平量之埋陰地
冬至後五十日發取量之息最多者歲所宜也

嫁李法正月一日或十五日以磚著李樹岐中令實
繁

種瓜法冬天以瓜子數枚內熱牛糞中凍卽拾聚置
之陰地正月地釋卽耕逐場布之率方一步下一斗
糞耕土覆之肥茂早熟

粟米酒惟正月得作餘月悉不成用笨麴不用神麴

粟米皆得作酒然青穀米最佳治麴淘米必須細淨

以正月一日日未出前取水日出卽曬麴至正月十

五日擣麴作末卽浸之大率麴末一斗堆量之水八

斗殺米一石米平量之隨甕大小率以此加以向滿

爲度隨米多少皆平分爲四分從初至熟四炊而已

預前經宿浸米令液以正月晦日向暮炊釀正作饋

耳不爲再留飯欲熟時預前作泥置甕邊饋熟卽舉

甕就甕下之速以酒杷就甕中攪作兩三遍卽以盆

合甕口泥密封勿令漏氣看有裂處更泥封七日一

古今圖書集成
酸皆如初法四酸畢四七二十八日酒熟此酒須用
夜不得白日四度酸者及初押酒時皆迴身映火勿
使燭明及度酒熟便堪飲
春候地氣始通椽椽木長尺二寸埋尺見其二寸立
春後土塊散上沒椽陳根可拔此時二十日以後和
氣卽土剛以此時耕一而當四和氣去耕四不當一
種苜蓿法正月燒去枯葉

作春酒法治麴欲淨剉麴欲細曝麴欲乾其法以正
月晦日多收河水大率一斗麴殺米七斗用水四斗

種冬瓜傍牆陰地作區圓二尺深五寸以熟糞及土
相和正月晦日種既生以柴木倚牆令其緣上旱則
澆之

陸璣詩疏萋蒿好生水邊及澤中正月根芽生旁莖
正白生食之香而脆美其葉可蒸爲茹

千金月令正月宜服桑枝湯取桑枝如箭幹大者細
挫三升熬令微黃以水六升煎三升去滓重湯煎二
升下白蜜三合黃明膠一兩炙作末煎成以不津器
貯之

古今圖書集成
六典膳部節日食料有晦日膏糜

宋史樂志太簇之律生氣湊達萬物於三統爲人正於四時爲孟春故元會用之

宋景文公筆記宦者宮人言正月與上諱同音故共

易爲初月王珪爲修起居注頗熟其文因上言秦始皇

皇帝名政改正政音月爲端月以正政音爲正征音令乞廢

正征音一字不用遂下兩制議兩制共是其請表去

其字曾公亮疑而問予予曰不宜廢且月外尚有射

正詩曰不出正兮不止正月矣曾悟密語相府罷之

嬾真子錄僕仕於關中於士人王忠君求家見一古

物似玉長短廣狹正如中指上有四字非篆非隸上

二字乃正月也下二字不可認問之君求云前漢剛

卯字也漢人以正月卯日作佩之名其一面曰正月

剛卯乃知今人立春或戴春勝春幡亦古制也蓋剛

者強也卯者劉也正月佩之尊國姓也與陳湯所謂

強漢者同義

雲笈七籤正月二日取商陸根三十斤淨洗粗切長

二寸許勿令中風絹囊盛盡懸屋北六十日陰燥爲

末以方寸匕水服旦先食服八十日見千里百日登風履雲久服成仙

夢溪筆談正月陽氣始建兆乎萬物故曰登明

稿簡贅筆正月十六日古謂之耗磨日張說耗日飲詩云耗磨傳茲日縱橫道未宜但令不忌醉翻是樂無爲又云上月今朝減流傳耗磨辰還將不事事同醉俗中人飲酒如今之社日此日但謂之耗日官司不開倉庫而已

二老堂詩話杜詩云元日到人日未有不陰時蓋此

七日之間須有三兩日陰不必皆晴疑子美紀實耳洪興祖引東方朔占書謂歲後八日一鷄二犬三豕四羊五牛六馬七人八穀其日晴則所主物育陰則災天寶之亂人物俱災故子美云爾信如此說穀乃一歲之本何略之也

周益公日記正月逢三亥桑田變成海是歲壬辰正月初六丁亥十八己亥三十辛亥歲有年癸巳正月亦三亥則立春在逢亥之後是歲大水

齊東野語秦始皇諱政乃呼正月爲征月史記年表

古今圖書集成
作端月

王羲之父諱正故每書正月爲初月或作一月

癸辛雜識種葡萄法於正月之末取葡萄嫩枝長四五尺者捲爲小圍令緊先治地土鬆而沃之以肥種之止留二節在外異時春氣發動衆萌競吐而土中之節不能條達則盡萃花於出土之二節不二年成大棚其實大如棗而且多液此亦奇法也

折梅花插鹽中花開酷有肥態試之良然已與家仲乙未正月十四日舟過鍾賈山大雪探梅僧院僧出

酒相餉因論前事僧言以醃豕滾汁熱貯瓶梅却能放葉結子余始知古人鹽梅和羹故自同調

山家清供梅落英淨洗用雪水煮候白粥熟同煮楊誠齋詩云纔看臘後得春饒愁見風前作雪飄脫藥收將熬粥吃落英仍好當香燒

王氏談錄茶品高而多年者必稍陳遇有茶處春初取新芽輕炙雜而烹之氣味復在

通考正月邀客飲春酒爲履端之會

正月己丑日白雞祀竈宜蠶

古今圖書集成
種靛正月中以布袋盛子浸之芽出撒地上用灰糞
覆蓋待放葉澆水糞長二寸許分栽俟葉厚方割將
葉浸水缸內一晝夜濾淨每缸內用礬灰八兩以木
扒打轉澄清去水是謂頭靛二靛三靛法亦如之
種黃麻古云十耕蘿蔔九耕麻地宜肥熟須殘年墾
俟凍過則土酥至春鋤成行壟正月半前下種種子
取斑黑者爲上

正月夜欲臥盪熱鹽湯一盆從膝下洗至足方臥以
通泄風毒脚氣勿令壅滯

治果木蠹蟲正月削杉木作釘塞其穴則蟲立死
便民圖纂種茄匏冬瓜葫蘆黃瓜菜瓜正月預先以
糞和灰土或盆或桶盛貯候發熱過以子插灰中常
以水灑之日間朝日影夜間收於竈側暖處候生甲
時分種於肥地

正月諸色果木樹芽未生之時於根旁掘土寬深將
根截去畱四邊亂根勿動用土覆蓋築令堅實則結
果肥大勝插接者謂之駟樹

正月取弱柳枝大如臂長一尺半燒下頭二三寸埋

古今圖書集成
之用杵打實常以水澆之必數枝俱生畱三四條茂者削去枝梢其枝必茂或栽插者長五六尺亦得正月修桑削去枯枝及低小亂枝條根旁開掘用糞土培壅此月不修理則葉生遲而薄

視聽抄吳諺曰正月逢三亥湖田變成海謂水大也壬辰年正月初六日己亥十八日辛亥三十日癸亥是歲大澇湖田顆粒不收癸巳正月亦有三亥然一亥在立春前是歲無水災

研北雜誌世謂正月三日爲田本命浙西人謂之夏

正三言夏正之三日俗以是日稱水以重爲上有年極驗

丹鉛續錄吳下田家以正月八日夜立一竿於平地月初出有影卽量之據其長短移於水面就橋柱畫痕記之梅雨水漲必到所記之處

餅史月表正月花盟主梅花寶珠茶花客卿山茶鐵幹海棠花使令瑞香報香木瓜

花曆正月蕙蘭芳瑞香烈櫻桃始葩徑草綠望春初放百花萌動

月令演正月天臘歲旦油十日人日金吾弛禁五十耗磨日六十

買兩夜燈十七十八補天穿十九送窮二十

田家五行正月十六日喜西南風為入門風主低田

大熟

農政全書金櫻子取其刺可卻姦取其花香味可玩

取其子可作藥正月插

五加皮取其幹可作骨取其刺可卻姦取其芽可食

取其根皮作藥作酒正月插

山東種薯法沙地深耕起土坑深二尺用糞和土各

半填入坑中足踐實正月中畦種薯苗長又加土壅

之

居家必用正月丁卯甲辰丙辰丁未己未乙酉丁酉

造麪醬酒醋吉

上春嫩茶芽每五百錢重以綠豆一升去殼蒸焙山

藥十兩一處細磨別以腦麝各半錢重入盤同研約

二千杵罐內密封窖三日後可以烹點愈久香味愈

佳

遵生八牋立春後庚子日宜溫蔓菁汁合家並服不

古

八圖書集

古今圖書集成
拘多少可除瘟疫

本草綱目神桃是桃實著樹經冬不落者正月采之
中實者良

苦菜卽苦蕒也春初生苗有赤莖白莖二種

盧都子樹高六七尺其葉微似棠梨春前生花朵如
丁香蒂極細倒垂正月乃敷白花

靈雀者小鳥也一名蜜母黑色正月至巖石間尋求
安處羣蜂隨之也南方有之

白英俗名排風子正月生苗白色可食

韭正月分蒔宜肥壤數枝一本則茂而根大

岩棲幽事戊戌春正三日夜大雪余偶戲云雪者洗
慾戒之齷齪洒火坑之煩惱填世路之坎坷喚夜氣
之清曉客曰此便可作雪贊

續文獻通考黃河自立春後東風解凍河邊人候水
凡一寸則夏秋當至一尺頗爲信驗謂之信水

山居要錄正月種芋秧先鋤地一遍以新黃土覆在
鋤過地上將芋芽向上密排種之用草覆蓋蓋候發三
四葉約四五寸高于三月間移栽之

種大葫蘆正月中掘地作坑方四五尺深如之實填油麻菜豆蕪及爛草等一重糞土一重草如此四五重向上一尺餘著糞土種十餘顆子待生後揀取四莖肥好者每兩莖相著一處以竹刀子刮去半皮以物纏之以牛糞黃泥封之一如接樹法裹之待相著活後各除一頭又取此兩莖相著如前法治待得活後惟畱一莖四莖合爲一本待著子揀取兩個周正好大者餘旋除之如是舊是一斗可容一石也若須爲器以模盛之隨人所好

燕都游覽記燈市在東華門王府街東崇文街西互二里許自正月初八日起至十八日而罷

孟春部外編

蠡海集玉帝生於正月初九日者陽數始於一而極於九原始要終也

白衣經正月八日南無華嚴衆意甘露苦王觀世音菩薩示現

佛書正月初六日江州武平南安白花巖定光佛生道書正月初四日太上大道玉晨君登玉霄琳房四盼天下有志節遠遊之心者

正月三日北斗翼聖真君降

三元延壽書正月初三日萬神都會
雲笈七籤正月九日朝太素三元君

集仙錄嗣天師張衡字子平與妻盧氏漢靈帝光和
二年正月二十三日於陽平山白日飛昇

高僧傳釋道安常山人形甚陋寓襄陽宣法寺注經
乃誓曰若所注不遠願見瑞相夜夢賓頭盧曰君所
注殊合理至秦建元正月二十七日有異僧形亦甚
陋來寺寄宿講堂直殿者夜見異僧從牕出入安起
禮之問可度脫否云至某月日方可度耳卒如其言

史纂左編馬鈺號丹陽子全真祖師命鈺鎖庵時隆
冬風雪四入庵之所有惟筆硯枕席布衾草履而已
然形神冲暢如在春風和氣中正月十一日鎖啓師
謂鈺曰從我歸去居崑崙烟霞洞

遵生八牋唐有虛耗小鬼空中竊取人物終南山進
士鍾馗能捉之以剗其目劈而啗之故當正月圖之
以厭鬼

楚通志何許陳三女相約入山修真大中元年正月
初五日雷雨作仙樂隱隱雲霧中遙見三女忽不知

所在馬蹄鞋蹟俱畱山上

廣異志南方赤帝女學道得仙居高陽嶠山桑樹上
正月一日銜柴作巢至十五日成或作白鵲或作女
人赤帝焚之女卽升天因名帝女桑今人至十五日
焚鵲巢作灰汁浴蠶子招絲象此也

西溪叢語靈竒祕要辟兵法正月上寅日禹步取寄
生木三呪曰喏臯敢告日月震雷令人無敢見我我
爲大帝使者乃斷取五寸陰乾百日爲簪二七循頭
上居衆人中人不見

立春部彙考一

周

周天子以立春日帥公卿諸侯大夫迎春於東郊行
布德施惠之令

按禮記月令孟春之月是月也以立春先立春三
日大史謁之天子曰某日立春盛德在木天子乃齊
立春之日天子親帥三公九卿諸侯大夫以迎春於
東郊還反賞公卿大夫於朝命相布德和令行慶施
惠下及兆民慶賜遂行毋有不當

陳注迎春東郊祭太皞勾芒也

後漢

後漢以立春日京師百官及郡國皆以青衣迎春於東郊始施土牛耕人於門外下寬大之詔

按後漢書禮儀志立春之日夜漏未盡五刻京師百官皆衣青衣郡國縣道官下至斗食令史皆服青幘立青幡施土牛耕人於門外以示兆民至立夏唯武官不立春之日下寬大書曰制詔三公方春東作敬始慎微動作從之罪非殊死且勿案驗皆須麥秋退

貪殘進柔良下當用者如故事

注獻帝起居注曰建安二十二年二月壬申詔書

絕立春寬緩詔書不復行

按祭祀志立春之日迎春於東郊祭青帝勾芒車旗服飾皆青歌青陽八佾舞雲翹之舞及因賜文官太傅司徒以下縑各有差

注月令章句曰東郊去邑八里因木數也 皇覽

曰距冬至日四十六日則天子迎春於東堂距邦八里堂高八尺堂階三等青稅八乘旗旄尚青田

古今圖書集成
車載矛號曰助天生唱之以角舞之以羽翟此迎春之樂也

又按志縣邑立春之日皆青幡幘迎春於東郭外令一童男冒青巾衣青衣先在東郭外野中迎春至者自野中出則迎者拜之而還弗祭三時不迎

北魏

魏以立春日遣有司迎春於東郊

按魏書禮志立春之日遣有司迎春於東郊祭用酒醑棗栗無牲幣

北齊

北齊以立春日受朝三公讀令賜酒有司迎春於東郊

按隋書禮儀志後齊立春日皇帝服通天冠青介幘青紗袞佩蒼玉青帶青袴青襪烏而受朝於太極殿尚書令等坐定三公郎中詣席跪讀時令訖典御酌酒卮置郎中前郎中拜還席伏飲禮成而出 又按志立春前五日於州大門外之東造青牛兩頭耕夫犁具立春有司迎春於東郊登青幡於青牛之傍焉

唐

唐以立春日祀青帝

按唐書禮樂志立春祀青帝以太皞氏配歲星二辰在壇下之東北七宿在西北勾芒在東南

元宗開元二十五年制以立春日迎春東郊

按唐書元宗本紀開元二十五年制自今後立春之日朕當率公卿親迎春東郊

肅宗乾元元年立春日御宣政殿讀時令

按唐書肅宗本紀乾元元年十二月二十八日丙寅

立春御宣政殿令太常卿于休烈讀時令

遼

遼以立春日皇帝御殿進酒戴勝始親執杖鞭土牛賜百官茶酒

按遼史禮志立春儀皇帝出就內殿拜先帝御容北南臣僚丹墀內合班再拜可矮檄以上入殿賜坐帝進御容酒陪位并侍立皆再拜一進酒臣僚下殿左右相向立皇帝戴幡勝等第賜幡勝臣僚簪畢皇帝於土牛前上香三奠酒不拜教坊動樂侍儀使跪進

古今圖書集成
綵杖皇帝鞭土牛可矮檄以上北南臣僚丹墀內合班跪左膝受綵杖直起再拜贊各祗候司辰報春至鞭土牛三匝矮檄鞭止引節度使以上上殿撒穀豆擊土牛撒穀豆許衆奪之臣僚依位坐酒兩行春盤入酒三行畢行茶皆起禮畢

宋

宋以立春日祀青帝及嶽瀆之神

按宋史禮志立春祀青帝以帝太昊配勾芒歲星三辰七宿從祀 又按志立春祀東嶽岱山於兗州東

鎮沂山於沂州東海於萊州淮瀆於唐州

仁宗景祐元年始頒土牛經於天下

按宋史仁宗本紀不載 按玉海景祐元年司天監校土牛經去其復重釋牛色等四篇爲農事之占十月己巳命知制誥丁度序之頒天下其牛色及執策者衣並以歲月支干納音相配

按宋向孟土牛經釋春牛顏色第一常以歲干爲頭色從甲乙丙丁戊己庚辛壬癸爲十干甲乙木其色青丙丁火其色赤戊己土其色黃庚辛金其色白壬

癸水其色黑餘倣此支爲身色從子丑寅卯辰巳午未申酉戌亥爲十二支寅卯木其色青巳午火其色赤申酉金其色白子亥水其色黑辰戌丑未土其色黃餘皆倣此納音爲腹從金木水火土爲納音金白木青水黑火赤土黃以此五色言之立春日干色爲角耳尾支色爲脛脰納音色爲蹄假令甲子歲立春甲爲干其色青用青爲牛頭子爲支其色黑黑爲身納音金其色白白爲腹丙寅日立春丙爲干其色赤用赤爲角耳尾寅爲支其色青用青爲脛脰納音是

火其色赤用赤爲蹄 釋策牛人衣服第二以立春日干爲衣色支爲勒帛色納音爲襯服色假令戊子日立春戌爲干當用黃衣子爲支當用黑爲勒帛納音是火當用赤爲襯服其策牛人頭屨鞭策各隨時候之宜是也用紅紫頭鬚之類 釋策牛人前後第三凡春在歲前則人在牛後若春在歲後則人在牛前春與歲齊則人牛並立假令立春在十二月內則是春在歲前即在牛後立春在正月內則是春在歲後即在牛前若立春在歲日同即是春與歲齊

古今圖書集成
人牛並立陽歲人居左陰歲人居右寅辰午申戌子
爲陽歲卯巳未酉亥丑爲陰歲 釋籠頭韁索第四
孟年以麻爲之寅申巳亥爲孟年仲年以草爲之子
午卯酉爲仲年季年以絲爲之辰戌丑未爲季年凡
韁索長七尺二寸像七十二候凡秦者乃牛鼻中環
木也亦名曰拘拘秦者牛鼻中木也以桑柘木爲之
卽以每年正月中宮色爲之假令寅申巳亥年正月
中宮二黑用黑色拘秦子午卯酉年正月中宮八白
用白色拘秦辰戌丑未年正月中宮五黃用黃色拘

秦

孝宗淳熙二年冬十二月以立春日爲太上皇帝行
慶壽禮

按宋史孝宗本紀不載 按禮志淳熙二年十一月

詔太上皇帝聖壽無疆新歲七十以十二月十七日
立春行慶壽禮是日早文武百僚並簪花赴文德殿
立班聽宣慶壽赦宣赦訖從駕至德壽宮行慶壽禮
致詞曰皇帝臣某言天祐君親錫茲難老惟春之吉
年德加新臣某與羣臣等不勝大慶謹上千萬歲壽

餘與前上壽儀注同禮畢從駕官應奉宮禁衛等並簪花從駕還內文武百僚文德殿拜表稱賀

淳熙十年十二月以太上皇后新年七十詔以立春日行慶賀之禮

按宋史孝宗本紀不載 按禮志云云

明

太祖洪武二十六年定有司進春之儀

按明會典凡進春先期數日奏聞欽天監遣官至順天府候氣屆期奏進舊儀與見行微有不同備列於

左洪武二十六年定是日早文武百官各具朝服於丹墀北向立應天府官置春案於丹墀中道之東引禮引府縣官就拜位贊鞠躬樂作四拜平身樂止典儀唱進春引府縣官舉春案樂作由東階陞跪置於丹墀中道俯伏興平身樂作又四拜禮畢鳴贊唱排班引禮引文武官北向立贊班齊致詞官詣中道之東跪奏云新春吉辰禮當慶賀贊鞠躬樂作贊五拜三叩頭訖樂止儀禮司奏禮畢成祖永樂 年改定鞭春之儀

按明會典有司鞭春永樂中定每歲有司預期塑造春牛并芒神立春前一日各官常服輿迎至府州縣門外土牛南向芒神在東西向至日清晨陳設香燭酒果各官俱朝服贊排班班齊贊鞠躬四拜與平身班首詣前跪衆官皆跪贊奠酒三奠酒訖贊俯伏與復位又四拜畢各官執綵杖排立於土牛兩傍贊長官擊鼓三聲播鼓贊鞭春各官環擊土牛者三贊禮畢 又按會典凡每歲立春前期五日欽天監官面奏差官二員往順天府候氣至之日回監具呈依書

占奏 又按會典凡立春前期候氣官同順天府官赴東直門外導迎芒神春牛至府

神宗萬曆八年又定進春之儀

按明會典萬曆八年定先一日鴻臚寺執事官設春

案一張於皇極殿外東王門簷下是日文武百官各

具朝服侍班執事官先詣中極殿行禮如常儀鴻臚

寺堂上官跪奏請陞殿導駕官前導教坊司樂作上

御皇極殿陞座樂止錦衣衛傳鳴鞭引人序班引順

天府等官先就拜位鳴贊贊鞠躬樂作四拜與平身

古今圖書集成
樂止內贊立於東王門外贊進春引人序班引順天府府尹至東王門外鴻臚寺堂上官招呼起案樂作擡案序班舉春案至正門外簷下置定樂止引人序班引府尹至案前立內贊隨至簷下立贊跪鴻臚寺堂上官傳跪外贊亦贊跪內贊贊進春府尹奏臣某等謹進某年春又奏皇太后陛下春中宮殿下春某王殿下春俱在午門外伺候請命司禮監官捧進請旨承旨畢內贊贊俯伏鴻臚寺堂上官傳俯伏外贊亦贊俯伏樂作與平身樂止引人序班將府尹引下

鴻臚寺堂上官招呼起案擡案序班舉春案至原處置定府尹仍入原班立外贊贊鞠躬樂作四拜與平身樂止順天府等官退下侍立對贊贊排班班齊文武百官入班立定鳴贊贊跪鴻臚寺堂上官一員於丹陛中道跪致詞云新春吉辰禮當慶賀致畢起身一躬由東邊門入殿內侍立鳴贊贊俯伏樂作與五拜叩頭與平身樂止鴻臚寺堂上官殿內跪奏禮畢傳贊禮畢鳴鞭駕興百官退進春樂與朝賀同

